

DISSERTATIO IURIDICA,  

---

DE  
**LEGIBVS**  
**AD PRÆTERITA**  
**TRAHENDIS,**

QVAM  
DEO TER OPTIMO MAXIMO  
SECUNDANTE,



MAGNIFICO AMPLISSIMOQVE  
**IUDICATORVM ORDINE**  
IN INGLVTA AC PERANTIQVA ELECTORALI ACADEMIA ERFORDIENSI  
CONCEDENTE,  
SVB MODERAMINE  
VIRI PRÆNOBILIS AC CONSVLTISSIMI  
**DN. RVDOLPHI CHRISTOPH.**  
**Senne,**

PHILOSOPHIÆ AC IURIS VTRIVSQVE DOCTORIS, NEC NON PROFESSORIS  
PVBLCI EXTRAORDINARIJ,  
PVBLCO ERFIDITORVM EXAMINI SVBJICIT,  
A V T O R  
**EVSEBIVS CHRISTIANVS**  
**ZINCKERNAGEL,**  
SAXO-GOTHANVS.

---

DIE XXIV. JULII M DCC XXXVII.  
IN AVDITORIO IURIDICO COLLEGII MAJORIS H. C.  

---

ERFORDIÆ, Typis HERINGII, Acad. Typogr.

THE  
OFFICE OF THE  
ATTORNEY GENERAL  
OF THE STATE OF NEW YORK

IN SENATE  
JANUARY 15, 1907

REPORT  
OF THE

COMMISSIONER OF THE  
LAND OFFICE  
IN RESPONSE TO A  
RESOLUTION PASSED BY THE SENATE  
JANUARY 15, 1907

ALBANY:  
J. B. LEECH, JR.,  
PRINTERS  
1907



## CONSPECTVS DISSERTATIONIS.

- Proæmium instituti rationem tradit.*
- §. I. *Legislatoriam potestatem præcipuum majestatis jus esse, tradit.*
- §. II. *Solis subditis leges ferri, probat.*
- §. III. *Demonstrat, leges ita ferendas esse a Principe, ut ab omnibus possint intelligi.*
- §. IV. *De quibus rebus Princeps non possit leges ferre, explicat.*
- §. V. *Leges ferendas esse de rebus sæpe accidentibus, proponit.*
- §. VI. *De rebus impossibilibus leges ferri non posse, docet.*
- §. VII. *Leges ferendas esse verbis dispositivis indicat.*
- §. VIII. *Quod leges generaliter ferendæ sint, exponit.*
- §. IX. *Leges regulariter futuris formam solum præscribere negotiis enarrat.*
- §. X. *Principem tamen ex justis causis legem ad præterita trahere posse, admittit.*
- §. XI. *Hoc tamen ita restringit, ne fiat in præjudicium tertii.*
- §. XII. *Hanc ob causam probe a Principe ponderandas esse circumstantias, inculcat.*
- §. XIII. *Principi non competere jus, leges penales ad præterita trahendi enarrat.*
- §. XIV. *Principem in dubio nunquam præsumi, legem ad præterita trahere velle, comprobatur.*
- §. XV. *Justas causas, quare Princeps*

- ceps possit leges ad præterita trahere, recenset.
- §. XVI. Legem de facto naturaliter turpi disponentem, ad præterita trahi, a Principe posse, concedit.
- §. XVII. Exemplo hoc illustrat.
- §. XVIII. Utilitatem publicam interdum flagitare, ut legislator legem ad præterita trahere debeat, continet, & exemplo hoc ipsum declarat.
- §. XIX. Significat, ipsam interdum naturam rei postulare ut ad præterita lex trahatur, licet Princeps in lege de hoc non mentionem faciat, quod asseritur de lege annullatoria.
- §. XX. Hoc exemplo dilucidius reddit.
- §. XXI. Alio exemplo id ipsum confirmat.
- §. XXII. Idem ostendit de Lege posteriori, prioris saltem declarativa.
- §. XXIII. Exemplo hoc ob oculos ponit.
- §. XXIV. Idem affirmat, si actus ante novæ legis promulgationem suscepti, facile rescindi possint, simulque illud exemplo corroborat.
- §. XXV. Eandem sententiam fovet de lege priorem confirmando, & exemplum addit.
- §. XXVI. Hanc opinionem etiam applicat ad legem novam, ab usum veteris tollentem.
- §. XXVII. Exemplo hoc confirmat.
- §. XXVIII. Hoc etiam extendit ad leges revocatorias, & exemplis id patefacit.
- §. XXIX. Alia quoque negotia præter leges dari, quæ ad præterita trahantur, commonstrat, ac exempla adducit.
- §. XXX. Huic Dissertationi colophonem imponit.

PRO-



sis fiat, & fieri debeat, in dissertatione præsentī  
 ostendetur, pro ingenii tenuitate. Deinde,  
 quod ad selectum materiæ pertinet, nemo huc-  
 usque quod sciam, fuit, qui in hac materia ex  
 professo elaboranda operam navaverit, licet me  
 non fugiat, hinc inde autores quosdam casuum  
 nonnullorum huc pertinentium, mentionem  
 iniecisse, omissis tamen rationibus dubitandi &  
 decidendi, & exemplis huc spectantibus. Ope-  
 ræ igitur pretium facturum & non iliada post  
 HOMERVM me cantaturum putavi, si hanc  
 rem penitus inspiciam, eamque sub incudem  
 revocem, causas & rationes ex quibus leges ad  
 præterita trahendæ sint, tradendo, omniaque  
 exemplis illustrando. Hanc ob causam eam  
 legem in consarcinando hoc labore mihi ipsi  
 dixi, ut ante omnia ostendam, quibus ex causis  
 Princeps expressæ possit legem ad præterita tra-  
 here, deinde etiam demonstratos dem illos ca-  
 sus, ubi ipsa natura rei hoc importat, ut lex ad  
 præterita extendatur, licet in ipsa altum sit de  
 applicatione ad præterita silentium, ac utut le-  
 gislator nec vola nec vestigio mentionem hac  
 de re fecerit. Si vero quibusdam ad palatum  
 non

non sit elaboratio hujus thematis, illi eo minus excusationem mihi denegabunt, quo magis elucēt difficultates, quibus illud obnoxium est, illi vero quibus nihil arridet, sed omnia virgula censoria perstringunt, sciant, illos ipsos nec mihi placere, nec me velle ut ipsis placeam, ipsis enim placuisse, est displicuisse. Deum vero T. O. M. ardentissimis imploro precibus, velit mihi in hoc negotio perficiendo gratia sua divina assistere, veritatemque revelare, quo omnia feliciter & ex voto possint cedere.

## S. I.

**I**Nter jura majestatica primarium, eumque maximum occupat locum, legum ferendarum potestas, fuit enim ea immediate ex natura majestatis, & idcirco ad essentialia ejus pertinet, non ad ea tantum, quæ Principi in signum eminentiæ relinquuntur, sed etiam ad illa, ex quibus præcipue æstimatur majestas, tanquam ejusdem character certissimus, recte statuentē CASPARO ZIEGLERO. a) Vti vero lex ferenda est ab eo, qui gaudet in republica summo imperio; b) ita in imperio nostro Romano - Germanico leges universales valorem in singulis provinciis ejusdem habentes, conduuntur ab Imperatore, adhibito consensu statuum imperii, c) hinc pronio fuit alveo, proceres imperii, vigore superioritatis territorialis, ha-

bere jus legum ferendarum proprio iure, utut interdum ex pacto cum statibus provincialibus inito, ad impetrandum illorum consensum obligati sint, tradente HERTIO. d) Hæc, sicuti extra omnem dubitationis aleam posita sunt, ita quoque condunt status imperii leges juri communi imperiique Recessibus contrarias, quamvis ipsi ad observantiam Recessuum vigore pacti teneantur, uti hoc probatum dederunt STRYCKIUS e) & THOMASIVS f) hinc porro sequitur, magistratus in civitatibus municipalibus legislatoria potestate esse destitutos, licet nemo inficias ire possit, aliquando statuta permissu Superioris ab illis condi, vel cum confirmatione, vel absque confirmatione, prouti privilegium ipsis concessum illud permittit, probante STRUVIO. g) Denique etiam exinde sequitur, opificia, collegia, & universitates, non posse condere statuta, nisi de rebus, ad illorum professionem, vel artem, vel universitatem pertinentibus, modo sint concepta de rebus licitis, procul enim esse debent, mores collegiorum depravati ac inepti, docente BRUNNEMANNO h) & SCHWEDERO. i)

- a) *De juribus majestatis lib. 1. c. 1. §. 1.*
- b) *L. ult. C. de legibus & constitutionibus principum.*
- c) *Artic. §. §. gaudeant instrumenti pacis Westphalicae.*
- d) *In dissertatione de consult. LL. & judic. special. Rom. Germ. Imp. rebus publ. §. 3. seqq.*
- e) *In usu moderno ff. lib. 1. tit. 3. §. 6. 7. 8.*
- f) *In dissertatione de statu imperii potestate legislatoria contra jus commune.*
- g) *Exercitat. ff. Exerc. 2. §. 24.*
- h) *Ad l. fin. ff. de colleg. & corp.*

i) *In*



i) *In introductione ad ius publicum sect. 2. cap. 14. part. spec. §. 16.*

§. II.

Ex adductis, nisi omnis fallor, satis apparebit, legislatoriam potestatem habere illum, qui suprema in republica est instructus potestate. Quemadmodum vero suprema illa potestas, extra rempublicam unicuique Principi propriam, se non exserit; ita leges solis præscribantur subditis necesse est, siquidem forenses sive extranei legibus reipublicæ alienæ ordinariæ non subjacent, conf. C.OCCEJI, a) STRYCKIUS, b) MEVIUS c) & HERTIVS, d) ex quibus non potest non sequi ipsum legislatorem non teneri legibus a se latis e) quod attinet regulas iustitiæ, licet iis omnino obligetur ex regulis prudentiæ, f) cum omnes fere subditi soleant componere actiones ad exemplum Principis, hinc omnino Princeps prudenter facit, quando ad evitandum scandalum, ipse leges a se latis observat. Contin- git etiam interdum, ut vi pacti Princeps ad leges proprias sit obligatus, quis enim est, quem fugiat? Imperatorem ex conventionem ad leges publicas adstringi, vid. STRYCKIUS, g) Omnes vero subditi in republi- ca legibus superioris tenentur, nisi aliqui possint exemptionem docere: modus vero, quo obligant le- ges, est diversus, dantur enim leges, quæ formam præ- scribunt actui cuidam, qua non adhibita actus est nul- lus, sic e. g. testamentum solenne absque adhibitione septem testium est nullum: vel lex solummodo facul- tatem rite & legitime aliquid faciendi indulget, v. g. pa-

tri familias testamenti factionem; tali igitur in casu arbitrio unuscujusque est relictum, utrum hoc jure uti velit, nec ne: denique etiam dantur leges præcipientes, carentes tamen sanctione pœnali, quæ sunt improprie ac imperfectæ, ac potius pro consiliis habendæ.

- a) *De potest. in territ. fund. tit. 2. §. 6. seqq.*
- b) *In dissertatione de jure principis extra territorium cap. 3.*
- c) *Ad jus Lubecense quest. 4.*
- d) *De collisione legum sect. 4.*
- e) *L. 31. ff. de legibus SCtis & longa consuetudine.*
- f) *L. 4. C. de legibus & constitutionibus principum.*
- g) *In usu moderno ff. lib. 1. tit. 3. §. 9.*

### §. III.

Principi quoque nihil prius nihilque antiquius esse debet, quam ut leges ita ferantur, ut ab omnibus illarum sensus possit cognosci, a) cum enim primarium legis requisitum sit sanctio pœnalis, hinc maximam saperet iniquitatem, quando aliquis pœna ob transgressionem legis coerceretur, & tamen legem nunquam intellexerit, hinc fit, ut nulla lex, sive sit divina, sive humana, obliget ante promulgationem, siquidem per promulgationem demum voluntas legislatoris patefit, ita ut ignorantiam juris nemo allegare possit. Hæc, sicuti extra omnem controversiæ aleam posita sunt, ita vix ac ne vix quidem in Imperio nostro Romano Germanico possunt applicari ad leges Romanas lingua peregrina literarum monumentis consignatas, quæ licet non ab omnibus possint intelligi, nihilominus obligant, sufficitque adesse peritos harum legum, toties ab imperitis

ritis consulendos, quoties ignorant illarum dispositionem, uti hoc erudite demonstrarunt JO. NIC. HERTIVS b) & JOHANNES LVDÖVICVS PRÄSCHIVS c) exinde etiam factum est, ut iurium renunciaciones in contractibus non valeant, nisi præviam certioratione, prouti docuit JOHANN SAMVEL STRYCK. d) Quo igitur unusquisque possit eo meliorem nancisci legis promulgatæ notitiam, haut abs re in legibus Romanis provisum est, ut post duos demum elapsos menses ignorantia iuris amplius non excuset e) licet non inficias ire possim, scientem promulgationem legis ad illius observantiam statim teneri, nisi certum tempus legi sit additum, a quo obligatio demum initium capere debeat, f) hoc tamen albo notandum lapillo est, Recessus imperii Cameram Wezlariensem non obligare, ad sententias juxta illorum provisionem ferendas, antequam ipsi insinuatio facta est, docente BLVMIO g)

a) Per l. 9. C. de legibus & constitutionibus principum

b) in dissertatione de consult. LL. & special. Rom. Germ. Imp. rebus publ. §. 15.

c) de JCro vero & personato §. 17.

d) in dissertatione de certioration. jur. renunciand. cap. 1.

e) Nov. 66. cap. 1.

f) Reformat. polit. de anno 1577. tit. 18. in fine.

g) in processu Camerali tit. 2. §. 9.

#### §. IV.

Licetum omnino esse legislatori, in rebus quæ divinis legibus non sunt determinatæ, potestatem suam exercere, illis, qui leviter saltem juris publici universalis principiis tincti sunt, non potest esse obscurum, ita,  
ut

ut etiam ex justa causa juri naturali aliquid addere vel detrahere possit, monente VLPIANO a) & HERTIO. b) Si vero aliquid jam ab ipso Deo tanquam supremo legislatore determinatum sit, nihil quicquam in eo immutando concessum est majestati humanæ, sed potius, si legislator officii sui partes explere velit, legem divinam non inter subditos solum custodire, sed ipse quoque eidem morem gerere debet, cum Deum tanquam superiorem suum omnino recognoscere debeat, quamvis nihilominus permissum sit Principi connivere, & permittere ea, quæ sine magno malo emendari nequeunt, & talem permissionem non injustam esse, quodammodo præcipit naturalis ratio vid. SVTHOLT. c) & ZIEGLER. d) Dantur enim actus contra leges divinas suscepti, qui puniri nequeunt ab hominibus sine periculo majoris mali, illi igitur ut puniantur, ratio naturalis non solum non præcipit, sed potius suadet, ut quam diu periculum durat, tam diu maneant impuniti, ipsa etiam oracula divina hujus rei dilucida præbent testimonia, deprehendimus enim in illis talia negotia, quæ ex se & sua natura non sunt bona, permittuntur tamen in illis, non vero approbantur, præcavendi majoris mali causa, quorsum v. g. retulit legem de divortiis, Theologorum facile princeps, CHEMNITIVS. e)

a) in l. 6. ff. de justitia & jure

b) de collisione legum sect. 3.

c) in dissertatione de jurisdictione n. 81.

d) in tractatu de jure majestatis lib. 1. cap. 3. §. 58.

e) in loco de lege cap. 4.

§. V.

Princeps quoque eo curas suas adigat, ut ante omnia leges ferat de rebus sæpe accidentibus, a) quis enim est, quem fugiat, leges esse accommodandas statui rei publicæ & subditorum? ut mala rem publicam affligentia extirpentur, antequam tam altas radices egerunt, ut difficiles extirpati sint. Si vero in una materia casus obveniant frequentes & rari, tunc regula formanda erit de casibus frequentioribus, siquidem regulæ numero superare debent exceptiones, ita e. g. ordinariæ foeminæ lubrico sunt iudicio, rarius vero accidit, ut sibi rebusque suis, eo quo decet modo sufficient, hinc SCtum Vellejanum, id quod plurimum contingit, respexit, vid. STRYCKIVS b) sæpius quoque contingit, ut filii familias prodigalitatis sint studiosi, rarius vero, ut continentiae operam navent, hinc SCtum Macedonianum pariter animadvertit illud, quod sæpius accidit. Et hæc sunt negotia, quæ in utramque partem eveniunt, in unam vero sæpius, in alteram autem rarius: dantur vero etiam casus, qui per se rari sunt, & frequentioribus non opponuntur, quos leges non solent negligere, quorsum v. g. spectat, quod insula in flumine nata ad illòs pertineat, qui ab utraque parte fluminis prope ripam prædia possident, pro modo latitudinis cuiusque fundi. c) Singulare etiam habemus exemplum in casu, ubi quis filium reliquit, & uxorem prægnantem, ubi filius quartam tantum portionem hæreditatis paternæ accipit, d) quia nasci possunt tertigmini, qui casus ut ut forte inter rarissimos referendus

dus videatur, non tamen plane est hodie etiam in-  
 cognitus, STRYCKIUS enim refert e) tale exemplum so-  
 lenne de civitate Stralsundensi, ubi Anno 1672. a die  
 I Januarii usque ad festum Paschatos trina vice hic ca-  
 sus contigit, ut tres infantes vivi uno partu editi fue-  
 rint, imo idem in pago ad civitatem Halensem perti-  
 nente suo tempore adhuc superstitem fuisse uxorem  
 narrat, quæ bina vice tres uno partu edidit liberos, ex  
 quo apparet, legem hanc ad abrogatas non referen-  
 dam esse, præsertim, quia levi incommodo afficitur  
 filius, si enim non tot nascentur, residuum, & quicquid  
 portioni suæ adhuc defuit, cum fructibus interea per-  
 ceptis capiat. Contigit quoque hodie casus, de quo ius  
 Romanum etiam disponit, f) ut nimirum si plures  
 quam tres nascentur, decrescere debeat de portione  
 reliquorum, portio quarti, Francofurti enim ad Via-  
 drum uxor cujusdam militis uno partu quatuor filios  
 edidit, referente STRYCKIO. g)

- a) l. 3. seqq. ff. de legibus SCtis & longa consuetudine
- b) in notis ad Lauterbachium pag. m. 19, verbo sæpe acciden-  
tes.
- c) §. 22. Inst. de Rerum divisione.
- d) in l. 3. ff. si pars hered. pet.
- e) in usu moderno ff. lib. s. tit. 4. §. 2.
- f) in l. 4. ff. si pars hered. pet.
- g) loc. supra citato.

## §. VI.

Ultra posse neminem obligari, communi circum-  
 fertur proverbio, legibus etiam probato a) hinc leges  
 ferendæ sunt de rebus possibilibus, nihilque interest,  
 utrum

utrum res quædam sit physice impossibilis, sive moraliter, cum æque impossibile sit bono viro, quod fieri non debet, ac quod fieri non potest, neque enim omnino possumus, quicquid honeste non possumus b) ROBERTVS SANDERSONIVS c) triplici modo rem impossibilem dici, refert 1) impossibilitate naturæ, quomodo impossibile est hominem volare, piscem loqui, 2) impossibilitate facti, quomodo impossibile est, Cajum hodie Londini commorantem, cras convenire posse Titium Venetiis 3) impossibilitate juris, quomodo illud dicitur impossibile alicui, at quod non habet potestatem legitimam, de quo etiam illud intelligendum est, quod dici solet in legibus: id solum possumus, quod jure possumus, d) sic impossibile est rusticum alicui honores conferre posse. Pro impossibilibus habentur etiam leges conscientię vim inferentes, licet non physice, tamen moraliter. Quæ vero huc usque de rebus impossibilibus sunt adducta, non sunt ita intelligenda, quasi de impossibilibus lex non disponat, contrarium enim patet ex legibus nostris Romanis, e) ubi hæres sub impossibili conditione institutus, pro pure instituto habetur, sed quod ad impossibilia leges neminem obligent, nec obligare debeant. f)

a) L. 185. ff. de Regulis juris

b) L. 15. ff. de condit. inst.

c) Tractatu de juram. obligat. prælect. 2. n. 14.

d) L. 15. ff. de condit. inst.

e) §. 10. Inst. de hered. inst.

f) L. 185. ff. de Regulis juris.

## §. VII.

Leges quoque ferendæ sunt verbis dispositivis, ita ut verba assertiva vim legis non habeant, nisi per consequentiam quandoque, hinc semper in interpretatione discernenda sunt verba dispositiva ab enunciativis: illustre ac solenne hujus rei habemus exemplum in vetustissima illa lege imperii Aurea Bulla dicta, ubi septenarius numerus Electorum verbis enunciativis, non dispositivis habetur, ita ut pariter vim legis non habeat hæc enuntiatio, quod etiam a posteriori scimus, dum exploratum perspectumque habemus, Octavum & Nonum Electorum recentioribus temporibus accessisse, de quo vid. JAC. BRUNNEMANN. a) Ut igitur interpreti constet, utrum verba dispositiva an enunciativa sint, ante omnia antecedentia & consequentia sunt attendenda, quibus interjecta attemperari, atque respondere præsumuntur, & in genere, regulæ bonæ interpretationis hic omne punctum ferent.

a) In dissertatione de mutatione Aureæ Bullæ.

## §. VIII.

Quoniam autem constat, jura quasdam tantum personas respicientia, privilegia & jura singularia vocari, hinc leges generaliter constituendæ erunt, a) hoc modo, ut omnes in universum obligent subditos, licet omnino fieri possit, ut certæ personæ sint occasio legis generaliter postmodum obligantis: b) sic certæ personæ ansam dederunt Scto Vellejano & Macedoniano,



niano, & si ex vero loqui volumus, & dicere quod res est, omnino fateri debemus, omnes fere leges originem suam inde traxisse, quod certæ personæ, hoc vel illud factum culpandum, ac poena coercendum, commiserint, quamvis etiam sit verissimum omnes homines redarguens proverbium :

*Nitimur in vetitum semper, cupimusque negata.*

Deinde etiam constat, ex legibus digestorum de particulari casu loquentibus, generalia deduci posse axiomata, quæ vero ita debent esse comparata, ut sint æquitati & juri naturali convenientia, ac menti legislatoris non repugnantia, quoniam enim axiomata eruuntur ab interpretibus, hinc sponte sua sequitur, ipsos per illa non posse novum jus introducere, quod vero fieret, si axiomata legi naturali, ac voluntati legislatoris e diametro essent repugnantia.

a) *L. 8. ff. de legibus SCtis & longa consuetudine.*

b) *L. fin. C. de legibus & constitutionibus principum.*

## §. IX.

Expeditum quoque est, leges & constitutiones noviter promulgatas, futuris formam præscribere negotiis, hinc ad præterita regulariter non sunt trahendæ, a) vid. RICHTER, b) quantumvis verbum aliquod ambiguum appositum sit, veluti si lex ita loquatur: *si quis fuerit*, tradente PERETZ. c) Quoniam res quæ culpa caret, damnum afferre non debet, ideo cum ante constitutionem quis non sit in culpa per

contraventionem alicujus legis, sic non debet damnum pati in actibus præteritis, per constitutionem postea subsequutam, d) hocque eo magis in poenalibus obtinet, cum hujusmodi leges odiosæ sint, & non extendendæ propterea, sed restringendæ sint, e) in irrogandis enim poenis non spectatur conditio delinquentis quæ nunc est, cum sententia fertur, sed quæ fuit cum delinqueret, vid. KNIPSCHILD, f) cum de natura novæ legis & statuti sit, de futuris disponere, non autem de præteritis, monente COLERO. g)

- a) L. 7. C. de legibus.
- b) Decis. 4. n. 18. & 19. ubi præjudicia facultatis juridicæ Jenensis refert.
- c) In commentario ad legem modo allegatam.
- d) Cap. 2. X. de constitutionibus.
- e) Cap. diu. de Regulis juris in 6to, l. 42. ff. de penis, l. 155. §. fin. ff. de Reg. juris.
- f) De privilegiis civitat. imperial. lib. 2. cap. 3. num. 83.
- g) De processu execut. part. 1. cap. 10. n. 102.

### §. X.

Uti vero nulla fere datur regula, quæ exceptionem non admittat, ita etiam minime putandum est, leges novas sic sanciri non posse, ut præteritis negotiis nec amplius pendentibus formam præscribant. Primus casus, qui huc referri potest, est, si in lege vel statuto Princeps expresse mentionem faciat præteritorum, atque pendentium negotiorum. a) Cum enim humana societas post lapsum protopla-

con-

conservari, & ad finem a Deo ipsi propositum pervenire nequeat, hinc Principi omnino vigore officii, quo salus reipublicæ ipsi suprema lex esse debet, incumbit, ut leges accommodatas statui reipublicæ ferat, hinc etiam fieri potest, ut eadem salus reipublicæ postulet, ut leges ad præterita quoque trahendæ sint negotia: hoc vero tam crude minime est accipiendum, ac si Princeps pro lubitu, vel ex arbitrio suo leges ad præterita trahere possit, sed justæ debent adesse causæ, quando Princeps legem ad præterita extendere debet, hinc justas has causas enarrare, me operæ facturum pretium puto, quod fiet si ostendam, quomodo Princeps versari debeat, circa leges ad præterita trahendas.

a) *L. 7. C. de Legibus & constitutionibus principum.*

§. XI.

Ante omnia vero princeps respiciat, ne, quando legem fert præterita quoque complectentem negotia, in præjudicium tertii hoc faciat, princeps enim uti salutem reipublicæ eo quo fieri potest modo promovere debet, salus vero reipublicæ dependet a salute singulorum, ita illum quoque oportet, hoc modo nemini injuriam inferre, quod vero contingeret, quando alicui noceret Lex citra ipsius culpam, ac damnum inferret, quod nullo modo a subdito evitari potuisset, sic e. g. inique faceret princeps, si legem ferret ut imposterum nullus contractus emtionis venditionis sit validus, nisi in solenne instrumentum redactus fuerit, ita ut omnes contractus etiam ante hanc legem celebrati

brati absque solenni instrumento, invalidi declarantur, hoc æquitati naturali repugnare, quis est qui non videat? cum enim hucusque de substantia hujus contractus instrumentum non fuerit, sed absque vicio nullitatis omitti potuerit, maxime certe afficerentur injuria illi, qui solo consensu celebrarunt emtionem venditionem, quis enim quæso subditorum & contrahentium vaticinari potuit, Principem post aliquot annos elapsos, esse legem laturum, talem contractum annullaturam, supra vero jam fuit ostensum, de substantia legis esse promulgationem, hinc etiam nemini præjudicare debet illud, quod ante promulgationem est susceptum, præsertim cum in casu de emtione venditione modo adducto, hucusque validus ac licitus fuerit hic contractus, utut in scripturam ac solennem instrumentum minime fuerit redactus, ex quibus unicuique facile constabit, Principem non recte facere, quando legem ad talia præterita negotia trahit, quæ hucusque pro validis ac firmis ab uno quovis habita fuerunt, & ad talia, quæ non nisi cum maximo damno, incommodo ac injuria subditorum rescindi possunt, & denique si talis lex sit, de qua tempore suscepti negotii ne quidem cogitatum fuit, nec cogitari potuit.

## §. XII.

Facili igitur nunc constat negotio, probe esse ponderandas a Principe circumstantias, antequam ad præterita legem noviter latam trahat, ne legem ceteroquin justam per retrotractionem ad præterita reddat

dat injustam. Ejusmodi farinæ legem in jure nostro Romano a) deprehendimus, ubi juribus religiosissimorum locorum & ecclesiarum non præscriptionem longissimi temporis, sed centenariam solum opponendam esse disponitur, ita, ut hoc non in futuris solum, sed & præteritis, pendentibusque litibus & causis obtinere debeat, quæ constitutio in hypothese vix ac ne vix quidem ab iniquitate vindicari potest, prouti illius iniquitatem ex professo docuerunt PROCOPIVS b) & STRAVCHIVS. c) Hoc igitur modo abuti Principem potestate legislatoria, tam certum est, quam quod certissimum, cum lippis & tonforibus notum sit, leges ita esse ferendas, ne alteri jus quæsitum auferatur, jus enim semel subditis quæsitum, tam firmo stat talo, ut ne a Principe quidem illud auferri possit teste MEVIO, d) in lege vero supra adducta, illi, qui jamdum ex præscriptione longissimi temporis huc usque in rebus Ecclesiasticis & Religiosis obtinente jus quæsitum nacti fuerunt, hoc jure iterum privantur, dum lex ad præterita pendentia negotia quoque retrahitur.

a) L. 23. C. de sacrosanct. eccles.

b) In suis Anecdotis.

c) In dissertatione Irnerius non errans cap. 3.

d) Part. 2. decis. 56. n. 1.

### §. XHI.

Porro ex fundamento supra posito colligitur, Principem non posse legem poenalem ad præterita trahere,

C

re,

re, si nimirum lex illa poena afficiendum factum præcipiat, quod huc usque licitum ac saltim impunitum fuit, vel quidem poena in illud statuta fuit, sed non tanta, quantam nova lex irrogat, v.g. quando Princeps poenam carceris illis irrogare velit, qui ebrietati student, ita, ut etiam isti hac poena affiendi sint, qui ante hanc legem noviter latam ebrietati dediti fuerunt, hoc omnino repugnaret æquitati naturali, huc usque enim ebrietas non habita fuit pro re prohibita, ac speciali poena coercenda, & per consequens illi, qui huic vitio inescati fuerunt, illam poenam præfagire non potuerunt, ut illud cane pejus & angue abhoruerint, poena vero definiente GROTIUS a) debet esse malum passionis, quod infligitur ob malum actionis, hucusque vero ebrietas pro malo actionis saltem quoad effectum poenæ ob illam irrogandæ non habita fuit; in republica enim civili nihil pro turpi facto aut pro malo actionis habendum est, nisi quod est prohibitum & sanctione poenali munitum, licet me non fugiat, aliter rem se habere de jure naturali. Vtlerius etiam leges poenales a Principe in tali casu ad præterita trahi non possunt, ubi quidem huc usque factum fuit turpe in republica habitum, ac etiam poena coercitum, sed non tali, quali nunc illud noviter ex justa causa a legislatore puniendum sancitur, sic e.g. ponamus casum adulterium huc usque poena relegationis vel fustigationis fuisse coercitum, Princeps vero videns hanc poenam nondum esse sufficientem ad impediendam frequentiam adulteriorum, poenam capitalem gladii irrogaret, ab adulteribus & adulteris sub-

cun-

eundam, ita, ut etiam illi qui ante hanc legem nuper demum exasperatam, adulterium commiserunt, eadem poena gladii essent coercendi; quis est qui non videat iniquitatem ejusmodi legis? cum poenæ ea propter delictis inponantur, ut delinquentes illarum gravitatem ponderantes, eo magis illa reformident, quomodo vero possunt illa reformidare, quando ne quidem poenam cognitam ac perspectam habuerunt, & licet in casu modo proposito sciverint poenam relegationis, nondum tamen tantam formidinem sibi formare potuerunt, quantam poena gladii solet excitare, cum constet nihil esse homini acceptius vitæ conservatione.

a) *In jure belli & pacis libr. 2. cap. 20. §. 1.*

#### §. XIV.

Deinde quoque nunquam præsumitur in dubio, Principem voluisse, ut lex modo lata ad præterita retrahatur, supra enim ~~illis superque demonstratum~~ dedi, retractione in legum ad præterita, pertinere ad exceptiones a regula, cum regulariter leges tantum de futuris negotiis ferantur, constat vero exceptionem nunquam præsumi, sed ab allegante esse probandam, ita ut si in nova constitutione de præteritis expresse & nominatim non caveatur, ad præterita nunquam sit trahenda a) cum in dubio legislator de lite jam pendente cogitasse non præsumatur, nisi nominatim illius fecerit mentionem, probante BERLICHIO b) & multo minus de lite jam per senten-

tiam decisa & finita, licet in appellationis instantia correctio sententiæ speretur, ut tradit *CVJACIVS* c) ita ut quamvis lex nova expresse dicat, quod etiam servanda sit in causis pendentibus & futuris, non tamen habeat locum in causis ante legem promulgationis vid. *COLERVS* d) quia quamvis pendeat appellatio, causa tamen per primam sententiam reperitur decisa, & ideo ad decidam lex nunquam extenditur, nisi fiat mentio specialis, de quo conf. *BERLICHIVS*. e)

a) *L. 7. C. de legibus & const. Princip.*

b) *Decisione 159.*

c) *in Nov. 113. vers. quib. si lacus non est.*

d) *de Processu executivo part. 1. cap. 10. num. 102.*

e) *Decis. 159. num. 10. seqq. ubi præjudicium Scabinatus Lipsensis d. 11. Febr. 1625. in causa Hans Heinrichs von Sohlhausen zu Riesdorff, contra Moritz Haubolden von Schönberg assert.*

#### §. XV.

Tunc igitur solum Princeps habet iustas causas legem ad præterita trahendi, quando urgente necessitate, ac salute reipublicæ postulante hoc facit, & hanc ob causam est illi cavendum, ne sua qua pollet potestate abutatur, uti enim in omnibus rebus & negotiis, nisi modus observetur, facile excessus fiunt, ita & hic, quando Princeps indistincte idem jus in præteritis observandum vult, quod in futuris obtinere debet, facile contra suum officium peccare potest, deinde & negotia, quibus leges formam præscribunt, probe



be sunt attendenda, antequam ad præterita trahantur; prouti enim majoris momenti atque ponderis est negotium, quod lex concernit, eo graviore quoque, si ad præterita trahenda est, causæ requiruntur, in iis vero negotiis, quæ levioris momenti sunt, leviores quoque causæ urgentes legis ad præterita retractionem sufficiunt. In tali casu justa adest causa, impellens Principem, ut legem ad præterita trahere possit, quando negotium susceptum ex se & sua natura est invalidum, licet hucusque non fuerit prohibitum, sed licite susceptum: hujus rei exemplum deprehendimus in consuetudinibus nostris feudalibus, a) ubi Imperator FRIDERICVS per constitutionem latam fancit, ut non solum in posterum feuda sine Dominorum consensu alienari nequeant, sed prius quoque alienata revocari debeant, adeoque ad præteritas quoque alienationes suam extendit constitutionem, easdemque invalidas declarat, quod æquitati naturali repugnare, nemo erit, qui asseret, qui enim æqua lance judicii perpendit, neminem posse rem alienare, nisi in qua dominium plenum & perfectum habet, a se impetrare non poterit, ut credat, aliquid iniqui in hac reperiri constitutione: jam vero unicuique, qui tantum ut canis e Nilo juris feudalis principiis imbutus est, constat, vassallum tantum habere unam partem domini, utile nimirum, alteram partem vero, directum dominium nempe, habere Dominum, ex quibus non potest sequi non, ad alienationem utriusque consensum esse necessarium, quia neuter dominium plenum habet.

a) in cap. un. 2. Feud. ss. vers. nos autem.

§. XVI.

Secundus casus, ubi leges ad præterita trahi possunt, tradente BOEHMERO a) est, si lex disponat de facto naturaliter turpi. Quid vero turpitudine naturalis sit, & in quo consistat, paulo altius erit repetendum. In genere eam definiendam existimo, per actionem legi naturali contrariam in alterius præjudicium susceptam. Notanter autem dixi in definitione, actionem æquitati naturali repugnantem debere esse susceptam in alterius damnum, seu præjudicium; si enim damnum alteri per factum naturaliter turpe non inferatur, fieri non potest, ut lex ad præterlapso negotia trahatur, siquidem in tali casu, ubi turpitudine in solo agente ac committente est, ac in ipsius solum præjudicium vergit, revera legis ad peracta jamdum retrotractio nullius esset efficacix, cum trito circumferatur adagio, factum infectum fieri nequit, sic v. g. fingamus aliquem fuisse prodigum & sui juris, ac sua ipsius bona dissipasse, ita ut nemini eo ipso nocuisset, deinde vero lex feratur, ut omnia per prodigalitatem dissipata tam præterita quam futura revocentur, quis est qui non videat ejusmodi legis inconcinnitatem? cum illud, quod semel fuit absumtum, restitui ac recuperari nequeat, dum non constat, quis bona dissipata acquisiverit, vel etiam si constaret, nesciverunt tamen acquirentes ipsum fuisse prodigum, quia nondum fuit pro tali a magistratu declaratus, & per consequens ipsis nihil imputari potest, cum omni culpa ac dolo vacaverint, ex quibus luce meridiana clarius elucescit

cescit veritas supra evicti ac stabiliti principii, leges debere esse conceptas de rebus possibilibus, quod uti in genere firmo stat talo, ita etiam in legibus ad præterita trahendis obtinet, siquidem nemo ultra posse potest obligari. In alia omnia vero tunc eundem erit, si factum naturaliter turpe tendat in tertii cujusdam præjudicium, ita ut ejusmodi facto naturaliter turpi illi damnum inferatur, tunc enim talis actus potest rescindi ac annullari, cum naturali æquitati consentaneum sit, neminem cum alterius damno debere locupletari.

a) *in introductione ad jus ff. lib. 1. tit. 3. §. 14.*

§. XVII.

Exemplum hujus turpitudinis naturalis tertio damnum inferentis, etiam in jure nostro Romanoprehendimus a) in pacto legis commissoriæ. Est vero lex commissoria in pignoribus tale pactum, cum creditor pecuniam credit ea lege, ac sub ea conditione, ut si debita pecunia certo die non reddatur, pignus suum fiat, licet vero multi sint, qui statuunt, hoc pactum licitum esse, quia cuilibet licet de re sua statuere, quod vult, b) ac volenti non fit injuria, aliter tamen statuendum esse, illi quibus ex meliori luto præcordia Titan finxit, probe intelligunt, in animum revocantes, debitores plerosque, si non omnes, inopia pressos, quæcunque pacta, iniquissimas conditiones continentia, facile solere inire, ut solummodo pecuniam ipsis tantopere necessariam a creditore accipiant, deinde etiam regulariter, ac ut plurimum pignus,

pignus, quantitatem pecuniæ creditæ longe superat, si igitur pecunia debita, die statuto non reddatur, creditor cum maximo damno debitoris locupletior fieret, quod omnino e diametro æquitati naturali repugnat, & sic lex commissoria, prouti natura uniuscujusque legis est, disponit de casu ac re ut plurimum contingente, regulariter enim acut plurimum superat pignus quantitatem pecuniæ creditæ, ac ordinarie etiam omnes debitores inopia pressi sunt, & sic optime fecit imperator CONSTANTINVS c) legem commissoriam in pignoratitio contractu, ad præteritas tales conventiones iniquissimas ac continentes turpitudinem naturalem cum alterius damno, trahendo, ac præterita quoque talia pacta rescindendo, quod etiam in aliis rebus naturaliter turpibus, ac in alicujus tertii præjudicium peractis, procedere tantum abest, ut negem, quantum abest, ut hoc modo damnum alicui inferatur, sibi ipsi enim imputet ille, qui lucrum ex tali turpi pacto quæsit, quod illud iniverit, cum illius iniquitas tam clara ac perspicua sit, ut qui illam negare velit, soli lucem deesse affirmare videatur, hoc vero adhuc notandum est, quod licet lex de facto naturaliter turpi disponat, tamen ad præterita negotia recte monente Glossa d) trahi non possit, nisi hoc expresse in lege contineatur.

a) lib. 8. C. tit. 35.

b) L. in re mandata C. 21. mandati vel contra.

c) In l. 3. C. de pactis pignorum, & de lege commissoria in pignoribus rescindenda.

d) In commentario ad l. 3. C. de pactis pignorum, ubi provocat ad l. 7. C. de legibus.

§. XVIII.

Tertius casus, ubi leges ad præterita trahi possunt, ex sententia BOEHMERI a) est, quando ratio utilitatis publicæ id suadet, ita, ut nullum fere aliud remedium salutis publicæ conservandæ supersit. Uti igitur in tali casu necessitas caret lege, ita etiam multa licite fieri possunt, quæ alias cessante hac necessitate omnino illicita forent. Princeps igitur, & qui in republica summa pollet potestate, hac facultate extra omnem controversiam gaudet, ut, si videat, salutem & utilitati reipublicæ aliter consuli non posse, nisi eadem sit præteritorum, quæ futurorum ratio, leges ad præterita trahi jubeat, cum supra jamdum adductum fuerit; salutem reipublicæ Principi supremam esse debere legem. Illustre hujus casus exemplum, in legibus fundamentalibus imperii nostri Romano-Germaniciprehendimus b) in anno decretorio, qui pro norma restitutionis in ecclesiasticis, & quæ intuitu eorum in politicis mutata sunt, positus est, scilicet, terminus a quo hujus restitutionis est dies primus Januarii 1624. ita ut restitutio faciendâ sit, secundum hunc diem & annum, omnium Electorum, Principum, & statuum utriusque religionis, comprehensa libera imperii nobilitate, ut & communicibus & pagis immediatis plenarie & pure, cassatis omnibus interim in istiusmodi causis latis, publicatis & institutis sententiis, decretis, transactionibus, pactis dedititiis, seu aliis, & executionibus, reductione ad statum dicti anni dieique in omnibus facta. conf. HENNIGES. c) Postquam enim Germania nostra calamitatibus per 30. annos

D

dura-

durantis belli fere erat exhausta , ac utriusque religionis consortes nil magis in votis habebant , quam ut ipsis pace , qua tam diu caruerant , iterum frui liceat , bellum vero ob occupata ab Evangelicis bona ecclesiastica ac templa potissimum erat susceptum , tunc aliter Germaniæ non erat consulendum , nisi terminus quidam ad quem omnia essent restituenda , poneretur. Evangelici prætendebant omnia in statum Anni 1618. ex quo bellum initium ceperat , esse restituenda , Catholici vero reclamabant huic prætensioni , urgentes restitutionem secundum annum 1630. quo Sueci in Germaniam irruerant , tandem media via placuit , ac annus 1624. huiusque dies primus , pro termino restitutionis fuit electus. Et hanc ob causam factum est , ut lex hæc fundamentalis præterita negotia expresse respiciat , illisque formam præscribat , ex duobus nimirum malis minus pro salute reipublicæ erat eligendum , aut enim totalis ruina reipublicæ nostræ erat permittenda , aut pax sancienda , pax vero nunquam obtineri vel saltem raro potest , nisi aliquid de jure remittatur. Concurrentibus igitur ejusmodi circumstantiis iisdemque rationibus , pariter legem ad præterita negotia retrahere posse , eo minus dubii habet , quo magis constat , reipublicæ conservatione Principi nihil debere esse prius , nihilque antiquius.

- a) In introductione ad jus ff. lib. 1. tit. 3. §. 14. pag. 25.
- b) In instrumento pacis art. 5. §. 2.
- c) In meditationibus ad instrumentum pacis art. 5. §. 2.

## S. XIX.

Huc usque ostendi, quantum instituti ratio permittit, quando, & ex quibus causis Princeps expresse legem ad præterita trahere possit negotia. Nunc erit demonstrandum, nonnunquam etiam ipsam naturam legis ita esse comparatam, ut licet in ipsa lege non mentio fiat præteritorum negotiorum, ita ut nec vo-  
la nec vestigium de hoc inibi reperiat, nihilominus tamen præteritos quoque respiciat actus, quorsum nunc tanquam quartum casum refero, tradente SCHNOBELIO, a ) quando lex annullando procedit: annullat vero lex actum quendam, quando invalidum illum declarat, ita, ut licet susceptus sit, tamen pro non suscepto habeatur, nullam vim, nullam efficaciam atque obligationem illi concedendo, legis igitur ejusmodi annullantis naturam sic esse comparatam, ut debeat ad præteritos actus trahi, exinde luce meridiana clarius elucescit, quod, quando ex opposito consideramus, legem prohibentem, animadvertamus, illam, nullum negotium jamdum peractum invalidum reddere, sed potius ex se & sua natura negotia contra talem legem latam ex post commissæ, ipso jure nulla sunt, ita ut ne quidem declaratio nullitatis opus sit: contra vero lex annullans revera esset frustranea, nisi præterita respiceret negotia, illisque efficaciam adimat, siquidem, quando futura respiceret, esset lex prohibens, non annullans, cum toto coelo differant, lex annullans & prohibens, uti hoc illis, qui tantum primas doctrinæ moralis & jurisprudentiæ naturalis duxerunt lineas, satis super-

que constat. Vtut verò ipsa indoles legis annullantis hoc importet, ut ad præterita applicetur negotia, licet expresse hoc in illa non contineatur, nihilominus tamen Princeps & hic sibi cavere debet, ne in ferenda tali lege annullatoria fines officii sui excedat, quod certe contingeret, legem annullatoriam ferendo, de eiusmodi rebus, quæ nullam neque injusticiam, neque turpitudinem continent, sed æquitati atque justitiæ quam optime sunt conformes.

a) In dissertationibus ad ff. dissert. 1. §. 18.

§. XX.

Haut abs re erit, si casum hunc uno alterove exemplo ex jure Romano petito illustrem, talem siquidem legem annullatoriam tulit imperator JUSTINIANVS, a) quando pacta de dividenda & communicanda hæreditate alicujus tertii adhuc viventis, nulla esse jubet, quoniam incivile est, viventis hominis bona in sortem & divisionem vocare, & ita quasi ejus mortem voto ac spe præcipere, ex quibus non potest sequi non, hanc dispositionem imperatoris JUSTINIANI solum locum habere inter illos, ad quos jure cognationis alias perventura erat hæreditas, cui sententiæ etiam subscribit BRUNNEMANN, b) vel etiam inter eos, quibus ab extraneo facta est spes successionis; si enim nullam haberent spem successionis, quomodo de successione pacisci possint; scio cum ignarissimis c) cum privatio præsupponat habitum, & in eum qui non habet spem successionis, non cadat pœna



na privationis successionis, pactum enim hoc successorium adeo illicitum erat, ut portio paciscentis ad fiscum deferatur, d) nisi tertius ille, de cujus hereditate paciscuntur, consentiat, & in voluntate sua perseveret, quia ille consensus tollit votum captandæ mortis, probante CARPZOVIO, e) de quo voto captandæ mortis venuste canit OVIDIVS. f)

*Filius ante diem patrios inquit in annos.*

Primaria ratio, quare hoc pactum apud Romanos fuerit prohibitum ac nullum declaratum, est naturalis turpitudine, quam semper habere creditur, bonisque moribus adversari dicitur, si tertio ignoranti fiat; g) votum vero captandæ mortis non per se, sed tantum tanquam consequens illius turpitudinis attenditur, nec adeo fundamentum decisionis constituit primario, & multis casibus plane abesse potest, turpitudine pacti nihilo secius manente. h) Licet autem Germani non ita insidias vitæ struxerint illis, quorum hereditatem expectabant, ita ut votum captandæ mortis apud illos cesseret, attamen Principalis ratio imperatoris JUSTINIANI etiam ad illos quadrat, ex quo etiam factum est, ut pacta de tertii ejusdemque certi hereditate, non hodierno magis quam civile jure subsistant, quando ille vel non consentit, vel consensum revocat ante mortem, & ita responsum esse a Facultate juridica Wittebergenſi, refert BERGERVS, i) cetera vero pacta successoria, quæ non ita sunt comparata, universali Germaniæ consuetudine subsistunt, & non inter illustres solum, sed etiam inter privatos provali-

dis pronunciantur, docente WERNHERO k) & LEYSERO, l) ex hisce nunc facile constabit, quomodo actus vel negotium, quod lex annullat debeat esse comparatum.

- a) *L. fin. C. de pactis.*
- b) *In commentario ad l. fin. C. de pactis.*
- c) *Cum hoc ipsum clare in lege cit. requiratur.*
- d) *L. 30. ff. de donat. & l. 2. §. ult. ff. de his quæ ut indignis.*
- e) *Part. 2. const. 35. Def. 19.*
- f) *Lib. 1. Metamorphos. vers. 148.*
- g) *L. fin. C. de pactis vers. secundum veteres.*
- h) *L. 29. §. ult. ff. de donat. & l. 2. & §. ff. de his quæ ut indign.*
- i) *In æconomia juris lib. 2. tit. 4. §. 48. not. 1.*
- k) *Vol. 5. part. 7. obs. 145. pag. 288.*
- l) *In meditationibus ad pandectas vol. 6. specim. 736. meditation. 17. pag. 387.*

## §. XXI.

Aliud exemplum ejusmodi legis annullatoriae præbet Imperator ZENO, a) quando annullat nuptias cum fratris prædefuncti uxore contractas. Quamquam autem me non lateat lege MOSIS jussum olim fuisse fratrem, adducendam fratris prædefuncti uxorem, quæ nondum liberos procreaverat, b) attamen quis est quem fugiat, rationem tunc temporis pro hoc matrimonio militantem, hodie cessare? allegant nimirum pro ratione Theologi, quare hoc matrimonium concessum fuerit, quod tunc temporis fideles magno flagraverint desiderio, de Messia ex stirpe eorum

rum prognerando, multumque iuvaverit, ne deleatur nomen defuncti ex stirpe ISRAELIS, hinc etiam ipsos interfuisse, ne frater aliquis decederet, stirpe non relicta, hodie vero cessante ratione hac, omnino etiam cessare debet concessio ista, ob hanc specialem rationem facta, ita ut quod tunc temporis licitum fuit, hodie pro turpi habeatur, fusius disquirat in hanc divinam constitutionem, super ducenda defuncti fratris uxore, JACOBVS PERIZONIVS. c) Ex eadem quoque ratione polygamiam Patriarchis veteris testamenti permissam fuisse, asserunt, quæ vero ratio utrum stringens sit, ipsis dijudicandum relinquo, licet omnino hanc pro veriori habeam, illam permissam fuisse, ob multiplicandum genus humanum, prope ad incitatem redactum, hodie vero Polygamia pariter pro turpi ac illicita habetur, ob cessantes has rationes. Hanc ob causam optime fecit Imperator ZENO matrimonia cum præ defuncti fratris uxore contracta, absolute annullando, & præterita hoc ipso rescindendo, ita, ut licet quidam Aegyptiorum id circo mortuorum fratrum uxores duxerint, quod ea imbuti fuerint opinione, post fratrum mortem tales uxores virgines mansisse, quoniam corpore non convenerint, hinc nuptias re nondum esse contractas, hanc tamen rationem spreverit, ac nuptias nullas declaraverit. Eo minus autem est, ut hæc opinio Aegyptiorum aliquem in admirationem rapiat, quo magis teste GOTHOFREDO d) constat, Aegyptios, sorores eodem patre, eademque matre genitas, ducere potuisse, huc etiam referendum est illud, quod ÆMILIVS PROBVS nobis refert

refert, c) Atheniensium moribus licitum, nec turpe fuisse, sororem germanam in matrimonio habere. Eodem modo etiam res se haberet, quando v. g. in aliqua republica adhuc floreret polygamia, Princeps vero ferret legem annullatoriam polygamiae, tunc omni dubio careret, ad praeiterita quoque talem legem esse trahendam, ac uxores omnes prae-ter unam dimittendas, utut hae uxores ante hanc legem essent ductae, cum de natura ejusmodi legis sit, actus jamdum patratos invalidos reddere, iisque omnem efficaciam adimere, uti supra hoc fusius evictum ac argumentis stabilitum fuit.

a) in L. 8. C. de incestis ac inutilibus nuptiis.

b) Deut. 25. v. 5. Luc. 20. v. 28.

c) in peculiari dissertatione, quam cum aliis duabus 1722. edit. ait Vir Cel. JO. GOTTLIER HEINECCIUS.

d) in notis ad legem modo citatam.

e) in CIMONE & proœmio vitarum.

## §. XXII.

Pariter quoque ex se & sua natura, licet nominatim lex id non caveat, ad praeiterita trahitur, tradente HUBERO, a) lex nova, prioris saltem declarativa, quem casum tanquam quintum huc referendum censeo, cum nimirum confectum sit, talem legem declarativam nil novi statuere, sed tantum casum hucusque dubium explicare, atque ostendere, quomodo intelligendus sit, ita e. g. dicitur, servitutem non debere per sententiam constitui, sed quæ ante est, declarari, b) hinc

hinc sponte sua sequitur, præteritorum eandem debere esse rationem, quæ futurorum, siquidem mens ac voluntas Legislatoris in ferenda lege statim fuit, quod ita sit capienda, prouti nunc illam declaravit, ex quibus omnino colligitur, neminem posse legem declarare, quam ipsum summum Principem, legislatoria potestate instructum, ita ut exinde oriatur interpretatio authentica, ut igitur hæc res eo melius pateat, uno alterove exemplo ipsam declarabo, v. g. vetus lex fuit, inter conjuges lucra & damna, durante matrimonio esse communicanda, dubitatum vero hucusque fuit, utrum hæc communicatio ipso jure, utrum vero mediante cessione fieret, elapso deinde aliquo temporis spatio lex lata est, quæ eam ipso jure fieri determinavit, & declaravit, hujus legis sententia vero ex post matrimoniis antea pridem contractis indistincte fuit applicata, referente SANDIO. c) Eodem modo res se haberet, quando Princeps legem tulisset, de hæreditate non aliter adeunda, quam mediante inventario, inde vero dubium esset ortum, utrum etiam liberi & hæredes sui, hoc onere gravandi sint, hanc ob causam Principem adeunt, ipsum interrogantes de sensu hujus legis, quo facto lex declarativa fertur, illos eximens ab hoc onere, tunc omnino etiam illi qui ante hanc legem declarativam, hæreditatem absque inventario adiissent, securitatem nanciscerentur, ac indistincte hoc privilegio fruerentur, ita ut nullum ipsis exinde metuendum sit periculum.

a) In prælectionibus ad ff. lib. 1. tit. 3. §. 10.

b) L. 3. §. 4. ff. si servitus vindicetur.

c) Lib. 2. tit. 5. def. 6. ab HVBERO. loc. cit. alleg

§. XXIII.

Illustre hujus casus exemplum in jure Romano quoqueprehendimus, quod nobis suppeditat imperator noster JUSTINIANVS, a) qui liberos ante subsequens matrimonium natos pari cum postea natis, ac aliis legitimis fortuna donavit, idque in triplici lege, b) unde dubium ortum ac disceptatum fuit, an jus illud & iis pro sit liberis, de quibus antequam lex hæc promulgata, disceptatum fuit in judicio, cum jura futuris alias dent formam negotiis, c) hunc scrupulum ut adimat imperator JUSTINIANVS, sanxit, ut pendentes de naturalibus ante natis, controversiæ, mensuram suam petant ex hætenus latis ac publicatis legibus, d) nullo attempto discrimine, utrum pater mortuus sit, an vero adhuc in vivis argat, nisi decreto vel transactione lis sit sopita, idque ob favorem liberorum, & honorem matrimonii, qui favor tantus est, ut multis adhuc insuper ab imperatoribus affectus sit beneficiis, e) hoc igitur modo declaravit legem suam imperator JUSTINIANVS, & insimul expresse cavet, illam ad præteritos nondum tamen decisos casus, esse trahendam, quod, licet non sit factum ac clare expressum, nihilo tamen secius, effectus hujus legis ad præterita ex se & sua natura trahendus fuisset, uti §. antecedente evictum.

a) *Novell. 19. cap. 1.*

b) *Scilicet in L. 10. & 11. C. de naturalibus liberis, & cap. ult. Novell. 12.*

c) *L. 7. C. de legibus & const. princ.*

d) *Præsertim cap. ult. Novell. 12.*

e) *L. 8. C. de Repudiis.*



§. XXIV.

Sextus casus ex doctrina cel. WOLFII a) est, quando actus ante novæ legis promulgationem suscepti, facili negotio possunt mutari, hoc igitur in casu similiter lex ad præterita trahenda erit, utut expresse id in illa non contineatur, actus vero facili negotio possunt mutari, quando subjectis vel plane nullum, vel exiguum hoc ipso infertur præjudicium, ex quo omnino sequitur, naturam ejusmodi legis esse, ut præterita quoque comprehendat negotia, cum enim supra fuerit ostensum, ea propter regulariter legem non esse ad præterita trahendam, quoniam eo ipso subditis damnum inde emergeret, atque actus perpetrati sine maximo præjudicio non possent rescindi, ita econtra quando cessat ejusmodi præjudicium, tunc etiam ejusmodi lex actibus jamdum patratis formam præscribere poterit, cessante enim causa, cessat & effectus. Objicere quidem hic aliquis posset, quod factum infectum fieri nequeat, & quod actus semel patrati nunquam possint revocari, sed hæc objectio facile potest dilui, quando animadvertimus, tritissimum illud, quod omnium ore circumfertur axioma: omnis actio æstimanda est ex intentione atque scopo, quem agentes in faciendo habuerunt, sibi que proposuerunt, & sic in dubium quidem vocare non possum, ipsam actionem jamdum commissam, non posse rescindi & revocari, intentio tamen committentis illam actionem revocatur atque rescinditur. Exemplo res fiat clarius, ponamus igitur casum, huc usque licitum fuisse unicuique in republica, victu & amictu pro lubitu, etiam pretiosissimo uti,

ita ut non obftet lex sumtuaria, cohibens hunc luxum in vestimentis ac cibis, deinde vero fertur lex a Principe, modum ac limites ponens, ac unicuique pro dignitate præscribens, quibus vestimentis quibusque cibis uti debeat, illi igitur, qui jamdum sibi comparaverunt vestimenta, ipsis secundum hanc legem noviter latam non competentia, illis abstinere debent, quo ipso destrui ac revocari illorum intentionem ac scopum, quis est, qui non videat? in comparandis enim hisce vestimentis intentionem habuerunt, iis tamdiu utendi, quamdiu essent integra ac utenda, hæc vero intentio nunc revocatur atque rescinditur, licet actus, quo sibi comparaverunt has vestes, non possit infectus fieri, nullum etiam fere ipsis hoc modo infligitur damnum, dum vestes prohibitas, vel possunt aliis destinare usibus, vel vendere, vel etiam in aliam formam redigere, hoc pacto igitur nihil iniqui per talem legis ad præterita retractionem patrari, omni dubio caret, cum nemo jure suo quæsito privetur.

a) *In institutionibus jurisprudentiæ naturalis part. 1. cap. 2. §. 3.*

§. XXV.

Quando lex nova jus vetus confirmat, ipsa pariter natura ejusmodi legis importat, ut ad præterita trahatur, quod etiam docet PHILIPPI, a) qui casus septimum locum hic occupabit, cum enim confirmatio sit juris prius habiti corroboratio, b) ita exinde valide colligitur, effectum illius se ad præterita extendere debere, eo modo ut negotia jamdum peracta, de quibus tamen adhuc dubium fuit, utrum possint subsistere, eo ipso omni dubitatione carere incipiant, ex ad-



adductis igitur patet, corroboracionem seu confirmationem semper præsupponere aliquod jus jamdum adesse, qui enim confirmat aliquid, is non censetur dare, c) sed datum corroborare, sic e.g. in jure Romano provisum est, ne valerent donationes conjugum inter vivos, d) nihilominus tamen hæ donationes, si ante mortem non sint revocatæ, per mortem donantis confirmantur, e) & sic effectus hujus legis ad præteritis donationes extenditur, illasque validas reddit.

a) *In usu prædico Institutionum lib. 1. tit. 2. §. 6. Eclog. 16. num. 16.*

b) *Cap. inter dilectos b. X. de fide instrumentorum.*

c) *L. si donata §. si sponsus ff. de donat. inter virum & uxorem.*

d) *L. 1. ff. de donationibus inter virum & uxorem.*

e) *L. 25. C. de donat. inter virum & uxorem.*

§. XXVI.

Rem ipsam postulare, legem novam, abusum veteris tollentem, præteritis applicandam esse negotiis, unicuique, cui est mens sana in corpore sano, facile poterit persuaderi, quem casum ex mente supra laudati PHILIPPI a) octavo loco hic referam. Abusus legis autem in eo consistit præcipue, quando legi alia mens affingitur, a subditis, quam re vera legislatoris in illa ferenda fuit, hoc modo, ut actus intentioni illius plane contrarii, a subditis committantur, ejusmodi legem omnes tales actus contrarios, per abusum patratos tollere, exinde patet, quod per rerum naturam aliter fieri non possit, ut tollatur abusus, nisi per rescissionem ejusmodi negotiorum, per abusum legis commissorum. In alia omnia vero tunc eundum esset, quando lex solummodo provideret, ne posterum amplius ta-

les abusus committantur, a qua lege toto cœlo differt  
lex tollens abusum, quo modo enim poterit lex abu-  
sum tollere, qui nondum adest, ac nondum commis-  
sus est, ex quibus omnibus proho fluit alveo, ejusmodi  
legem ad præterita esse applicandam.

a) *In usu practico Inst. lib. 1. tit. 2. §. 6. Eclog. 10. n. 16.*

§. XXVII.

Ut hæc res eo melius pateat, exemplo illam decla-  
randam duxi, fingamus igitur, Principem legem tulisse,  
permittentem unicuique de rebus suis liberam dispo-  
nendi facultatem, subditi vero hoc jure concessio, adeo  
abuterentur, ut perdant omnia bona, ac exuant se suis  
patrimoniis, ita ut ad incitas redigantur, deinde vero  
ferret Princeps legem, omnes abusus hosce tollentem,  
hoc ipso omnes actus tali modo abusivo commissi re-  
scinderentur, cum ipsi reipublicæ intersit, subditos ha-  
bere bonis instructos, utpote sine quibus respublica  
nec conservari, nec defendi potest, ita ut talis immen-  
sa prodigalitas pro facto naturaliter turpi, & contra  
omnem honestatem suscepto, ac in præjudicium reipu-  
blicæ vergente merito habenda sit, expedit enim rei-  
publicæ, ne re sua quis male utatur a) quæ regula in  
statu civili omnino tradente Ill. BOEHMERO b) reci-  
pienda fuit, ex qua etiam jus declarandi prodigos na-  
tum est, hoc igitur modo, omne quicquid a talibus pro-  
digis ante legem abusum tollentem alienatum, ac ad ali-  
os pervenit, & revocari potest, revocatur, cum alias rei-  
publicæ pereundum sit.

a) §. 2. *Inst. de his qui sui vel alieni juris sunt.*

b) *In notis ad hunc §. Boehmeri.*

§. XXVIII.

§. XXVIII.

Ultimo denique loco ipsa natura rei etiam postulat, ut ad præterita negotia trahatur lex revocatoria, quæ jus aliquod, quo quis jam potitus est, iterum certis ex causis aufert ac eripit, cujus rei multa in jure nostro occurrunt exempla, brevitatis gratia tria tantum adducam, sic e. g. constat, illum qui dolose occidit defunctum, non posse retinere legatum, a) idem etiam est dicendum de eo, qui temere impugnat defuncti voluntatem, b) denique etiam ille, qui in ingratum contulit donationem, eandem revocare potest. c)

a) L. 7. §. 4. ff. de bonis damnatorum.

b) L. 8. §. 14. ff. de inofficioso testamento.

c) L. 10. C. de revocand. donat.

§. XXIX.

Dantur vero præter leges, & alia negotia, quæ ad præterita trahuntur, de quibus etiam in jure civili multa prostant exempla, ita e. g. constat, omnia quæcunque a falso procuratore, mandato carente, gesta sunt, manifesto nullitatis vitio laborare, a) nihilominus tamen hoc nullitatis vitium sanatur ratihabitione, cum a falso procuratore gesta, absolute & simpliciter nulla non sint, sed in favorem solum ejus, cujus negotium citra mandatum suscepit, non subsistant, ex quo certo certius colligitur, accedente hujus ratihabitione, omnia quæ in judicio peracta sunt, robur ac valorem accipere, b) ratihabitione enim, utpote subsecutus consensus præcedentem defectum supplet, & ad principium cujuscunque actus retrotrahitur. c) Idem erit dicendum de jure postliminii, apud Romanos maximum usum præbente, hodie vero cessante, idem etiam nonnulli statu-



statuunt de ratihabitione nuptiarum invitis parentibus initarum, quos tamen solide confutatum ivit Ill. COCCETTI d) licet omnino in praxi aliud obtineat, ipso faciente autore modo laudato, e) denique etiam talem fictionem retroactivam multi statuunt in legitimatio-  
ne per subsequens matrimonium, quibus vero notam dixit Ill. BOEHMER. f)

a) l. 27. pr. ff. de procurat.

b) vid. *Dissertatio Consult. Dn. HIERON. FRIDER. SCHORCHII de Ratihabitione gestorum a falso procuratore hic Erfordia 1732. habita.*

c) l. 16. §. 1. ff. de pignor.

d) in jure civili controverso part. 2. lib. 23. tit. 2. quest. 5.

e) loc. cit. in fine.

f) in jure ecclesiastico protestantium tom. 4. lib. 4. tit. 17. §. 10.

### §. XXX.

Quamvis plurima adhuc restent, a themate hoc non aliena, nihilominus tamen perpendens, me dissertationem academicam solum, non vero tractatum conscribendum suscepisse, hic vela contraho, benignum judicium lectoris exspectans. Quæ autem tetigi, ut ordine pertracterem, nec sine solida ratione, diligenter operam dedi, id vero me ubivis assecutum fuisse, minime mihi persuadeo, cum homo sim, & nihil humani a me abesse sentiam, argumentum est spinosum, in quo, cum nullus adhuc ex instituto laboraverit, ego unus non ero, in cujus elaboratione nihil desiderari possit, his ergo ex rationibus adductis, veniam facile me impetraturum confido, qua impetrata eo feliciorem huic dissertationi imponere possum

F I N E M.



NOBILISSIMO ET DOCTISSIMO  
DN. EVSEBIO CHRISTIANO  
ZINCKERNAGEL,

S. P. D.

P R Æ S E S.

**C**ommunis vitæ consuetudine in proverbium abiit: in tempore venire, omnium rerum optimum est; quin idem de literarum studiis affirmandum sit, nullus dubito, tempore enim uti nihil pretiosius, ita etiam illi non inservisse, nihil tristius est. Probe hæc perpendens, NOBILISSIME DOMINE RESPONDENS, nihil fecisti relinqui, nisi ut temporis moram, per biennium in Academia Lipsiensi, doctrina B. GRIBNERI & Illustris RECHENBERGII & MASCOVII, sussultus, per annum in Jenensi, doctrina Illustris STRUVII & Cel. HEIMBURGII adjutus, & per sesqui annorum spatium in hac perantiqua Erfurtensi Academia transactam ex prælectionibus Cel. SCHORCHII proficiens, optime collocares, ac tempus eximeres, exploratum nempe habes, leges quidem posse ad præcærita trahi, tempus vero semel elapsum, nunquam redire. Quare morem gessisti monito Imperatoris JUSTINIANI, quando prima jurisprudentiæ elementa cupide legum juventuti dedicat; ac summa ope & alacri studio leges accepisti, non ut eas in transitu audires, in spem futura obli-  
vionis, sed ut illas in sanguinem & succum verteres. Ad hunc finem obtinendum, non solum collegia aliorum juris Antecessorum sedulo frequentasti, sed meis quæque prælectionibus eadem assiduitate interfuisti. Nihil igitur nunc restat, quam ut publicum doctrinæ TUE specimen edas, illudque sub meo qualicunque moderamine defendas. Aggressus autem es tale thema, quod plane non, vel saltem minus plene adhuc est elaboratum, hinc omnes bonos in eo consentientes habeo, TE rem tuam in eligendo & elaborando hoc themate  
bene

*bene egisse, & ita quidem, ut hoc specimine probaveris, quantum aliquando de TVA solidiori doctrina expectare possit respublica. Hujus igitur speciminis felicem & eruditam in jurisconsultorum cathedra defensionem, TIBI ex animo apprecor, ut toto legitimo opere ita perfectio, possit etiam respublica, in partibus TIBI credendis gubernari. Quod reliquum est, fortuna humana statori religiosissime supplico: velis TIBI porro adesse, consilia, conatusque TVOS in patrie commodum, EXCELLENTISSIMI PARENTIS gaudium, TVAMQUE salutem auspiciatissimo semper eventu probare; id unice in votis habens, velis me ulterius TVO dignari favore. Dabam in Academia Erfurtenſi d. XXIV. Jul. M DCC XXXVII.*

---

NOBILISSIMO ATQVE DOCTISSIMO  
JUVENI

EUSEBIO CHRISTIANO  
ZINCKERNAGELIO

J. U. CAND. DIGNISSIMO  
FAUTORI ATQVE AMICO OPTIMO

S. P. D.

M. JO. NICOLAVS SINNHOLD, P.S.

**J**urisprudentiam non in nuda tantum legum cognitione, sed in justa atque legitima earundem ad hominum actiones adplicatione, maxime consistere, apud omnes est in confesso. Idque nominis edocet notio; Prudentia enim juris denotat habitum & facultatem, tum leges rite declarandi, tum ad facta juste adplicandi unde & dicitur scientia juris practica. Facta autem, ad quae adplicanda leges, vel praterita sunt, vel praesentia, vel futura. Qua ratione ad praterita trabenda sint leges, praesenti specimine publico uberius exposuisti. Laudandi itaque conatus TVI, tum ob delectum, tum ob doctrinae praestantiam. Argumentum enim in quo ingenii vires periclitari constituisti, ita praclarum est, ut & utilitate

utilitate, & gravitate, dignitateque ac novitate se facile omnibus commendat. Sed & patrie & orbi litterario egregie demonstrasti, quid valeant humeri, quid ferre recusent. Gratuler igitur labores feliciter exant lator, & doctissimum industrie TVÆ specimen, TIBI-que mox ad patrios lares redituro, omnigenam DEI gratiam adprecor, utque DEO ac Reipublicæ, pro insignibus animi dotibus, multum profint studia ac labores TVI, ex animo rogeo. Deprecorabam Schwerborni, decimo die ante Cal. August. MDCCXXXVII.

---

**M**essem promittunt cultis cum moribus artes,  
Sed quæ inculta jacent jugera, messe carent.  
Nam qui virtutis, qui doctæ rura Minervæ  
Excolit, hic fructus hujus & hujus habet.  
Dat virtus famam, dat clarum nomen Apollo,  
Dat Sophie meritis laurea ferta comis.  
Hic æger, hic leges est: TE commoda larga sequentur,  
Et veniet segeti messis opima TVÆ.

*Hæc gratulabundus in amicitia & observantia tesseram  
doctissimo hujus Dissertationis Autori adjicere  
volui,*

J. G. OSANN,  
J. U. Licentiat.

---

**D**Et Deus Omnipotens, ut possis vivere faustus,  
Atque ut flet ventis aura secunda TIBI.

*His paucis Nobilissimo juxta atque Ornatisimo  
Domino hujus Dissertationis Autori, de  
specimine hoc doctissimo ex animo gratula-  
turus, quævis prospera precatur*

CHRISTIANVS LVDOVICVS  
L. B. ab HESBERG.

Die

**D**ie Freundschafts - Pflicht, so mich Dir längst verbunden,  
 Die rufft mir zu, auf! setz die Feder an:  
 Betrachte nur den Tag, so sich heut eingefunden  
 An dem man singt, an dem man gratulirt,  
 Weil Dich mein Freund / so Glück als Ehre ziert.  
 Wie! soll ichs thun? Wie! kan ichs unterlassen?  
 Beym Nachtigallen-Chor da müssen Schwäne passen.  
 Ich wünsche schweigend mehr, als wie ich schreiben kan.

Hiemit empfiehlt sich dem Hochgeehrtesten Herrn  
 Autori zu beständigen gütigen Andenken

Deffselben

gehorsamster Diener

**JOH. JAC. FRIEDR. WOLFF,**

*Ersordia - Thuringur,*  
*Opponens.*

**D**ie Themis krönet Deinen Fleiß  
 Mit vollen Segen, Glück und Gaben;  
 Nun wirst Du bald, auf vielen Schweiß,  
 Nach Wunsche, die Belohnung haben.  
 Ich nehme selber Theil daran,  
 Ich wünsche alles was ich kan,  
 Ich lasse Dir mein Herz und Flehen  
 Zu Deinen Glück und Wohlergehen.

Dem Hochgeehrtesten Herrn Autori solte hier zu  
 seinem gelahrten Specimine Academico, aus  
 schuldiger Ergebenheit gratuliren, ein alter  
 Academischer Freund und Diener aus  
 Leipzig

**AVGVSTIN LVDWIG OSANN.**

MS (O) 50

